

Ence l Comun General tel Statut

Tel DDL che muda l Statut, de gra a la cordanza anter l'Assessor Detomas e i Deputac Alfreider, Nicoletti e Dellai, l'é stat recognosciù ence l Comun general desche ent esprescion di ladins de Fascia

Fascia - L'Assessor regionèl a la Mendranzes linguistiches Giuseppe Detomas palesa duta sia sodesfazion per l'aproazion a la Cambra del DDL che revèrda l mudament del Statut de Autonomia, che tol ite referiments spezifics a la tutela de la mendranza linguistica ladina de la Dolomites.

Apede ai neves deric de raprezentanza recognosciui per i ladins tel chèder de la Provincia autonoma de Busan, per Fascia en particular l'é stat aproà l'emendament che perveit l'introduzion a livel Statutèr de n referiment al Comun General de Fascia, desche ent che costituesc esprescion direta de na comunanza minoritèra.

Chest resultat l'é l frut de na colaborazion forta portèda inant te chisc egn anter l'Assessorat regionèl a la Mendranzes linguistiches e la delegazion parlamentèra regionèla che ge é stata dò a dut l percors de chest Dessegn de Lege; da l'elaborazion del test, a la discusion te la comiscions competentes ensin la prejentazion te aula. N recognosciment particulèr cogn ge vegnir dat per chest ai deputac del Südtirol e del Trentin Daniel Alfreider, Michele Nicoletti e Lorenzo Dellai, con chi che Detomas à abù l met de se raportèr dò e dò: apontin de grazia a la desponibilità de chisc parlamentères e a n confront ascort e produtif l'é stat possibol arjonjer l'aproazion de chest emendament.

A chest proposit Dellai à dit che renforzèr chesta sort de tuteles - te chest cajo ti confronci di ladins - vel

dir afermèr n prinzip de biodiversità che no vèrda demò a la flora e a la besties de noscia Dolomites -Patrimoine de l'Umanità -, ma l cogn vardèr soral düt i lengac, la cultures, la usanzas sozièles de la popolazions che te la Dolomites les vif.

Per Detomas se trata de n passaje storich, l recognosciment de n prinzip che rapresenta na gran ocazion de emancipazion per na realtà minoritèra, a chela che ge vegn recognosciù na forma spezièla e rapresentativa de la comunanza.

Liter é segur amò lonch, ajache se trata de na lege costituzionèla, defat ge vel amò doi passajes, ma l'important l'é che jà dal prinzip e da la pruma aproazion del pachet de reformes, l Comun General de Fascia sie stat chiaramenter nominà.



L'assessor Giuseppe Detomas.